

29/06/2025

Aizawl

7:30 Hrs

REGIONAL NEWS

HEADLINES:-

1. India Prime Minister Narendra Modi kaihhruai sorkar laipui hnuaia hmalakna pakhat - STOP Diarrhoea Campaign 2025 chu Mizoramah pawh ngawrh taka kalpui mek a ni.
2. School Education Minister Dr. Vanlalhlana chuan sikul hrang hranga zirtirtu indaih lohna tikiam turin sorkar chuan zirtirtu sem rual kawngah theih tawp an chhuah zel niin a sawi.
3. Mizoram University chuan National Assessment and Accreditation Council (NAAC) endikna thar berah 'A+' Grade a hmu.
4. Prime Minister Narendra Modi chuan International Space Station Group Captain Shubhanshu Shukla a kawm.

<><><>

11 YEARS OF NDA GOVT (Health)

India Prime Minister Narendra Modi kaihhruai sorkar laipui hnuaia hmalakna pakhat - STOP Diarrhoea Campaign 2025 chu Mizoramah pawh ngawrh taka kalpui mek a ni.

Kawthalo Do Beihpui hi National Health Mission hnuaia Reproductive & Child Health (RCH) Programme hmalakna hnuaiah kalpui niin, thla hnih chung kalpui a ni dawn a, tun tumah hian Thupui atan "Kawthalo ven nan faina leh ORS a pawimawh" tih hman a ni.

Akahshvani zawhna chhangin Mizoram Child Health Consultant Dr R. Lalremruati chuan STOP Diarrhoea Campaign 2025 chu hlawk leh tangkai taka kalpui a nih thu a sawi.

STOP Diarrhoea Campaign hi kawthalo do beihpuithlakna, kum 2014 atanga lo hman tan tawh niin kum tin fur ruahtui tam laia hman thin a ni.

<><><>

EDUCATION MINISTER

School Education Minister Dr. Vanlalhlana chuan sikul hrang hranga zirtirtu indaih lohna tikiam turin sorkar chuan zirtirtu sem rual kawngah theih tawp an chhuah zel niin a sawi.

Dr Vanlalhlana hian nimin khan NE Khawdungseiah Govt. Primary School-II a hawng a, LTM High School, Ngopa a tlawh bawk a ni. He hunah hian Minister chuan, zirtirtu sawn chhuah chungchangah buaina a tam thin avangin Transfer & Posting rules thar duan a nih tur thu a sawi bawk.

Dr. Vanlalhlana chuan National-level Entrance Exam hrang hrang NEET leh JEE-ah te Mizoram chuan state dang kan tluk lo thin hle tih a sawi a,

zirlai naupangten hriatthiamna nen lehkhah an zir theih nan sawrkar sikul zawng zawng te chuan term exam-ah te zawhna inang (common question) an chhang tawh dawn a ni, a ti. Danglamna siam tur chuan syllabus leh zawhna kalphung siam that a, zirtirtute chu training a tam thei ang ber pek a tul a ni tih a sawi bawh.

Minister chuan sawrkarin mipuite rawn chung zelin hma lak a tum a ni, a ti a, zirna in tan hun chungchangah pawh nu leh paten school education website-ah te an duh dan an thehlut thei dawn a ni tih a sawi. Minister chuan NE Khawdungsei mipuite chu zirna in thar tha tak an neihnaah a lawmpui thu a sawi a, an kal lehzelnah turah duhsakna a hlan nghal bawh a ni.

<><><>

MZU

Mizoram University chuan National Assessment and Accreditation Council (NAAC) endikna thar berah 'A+' Grade a hmu a ni.

NAAC Peer Team chuan kumin June ni 3 atanga ni 5 chhung khan Mizoram University hi an endik a, kawng hrang hranga endikna hi kalpui a nih hnuah tun hnai khan zirna in that zawng hi an rawn tarlang ta a ni.

MZU website-a an tarlan dan chuan, Mizoram University hian kum 2014 leh 2019 khan NAAC hnuaiah 'A' grade a lo hmu tawh bawh a ni.

<><><>

NABARD

National Bank for Agriculture and Rural Development (NABARD) palai Pu Ajay Kumar Jain-a'n, Champhai khawpui chhunga Keilungliah Tuikhuah chu a hmunah kalin thil awmdan a enfiah.

Keilungliah tuikhuah project hi NLCPR hnuaia thawh a nih dan, a tir te atanga he tuikhuah siam a nih theihna tura hma an lakdan te bakah Keilungliah tuikhuah a nih dan leh hnathawh dan te chipchiar taka enkualin, hnathawktu PHE Department mite thil a zawtfiah a. He tuikhuah khuah a nih dan leh hmalak dante a hriatin, a lungawi thlak hle nia a hriat thu a sawi.

Pu Jain-a hi PHE EE Pu Darthangvunga leh a thawhpui ten lo dawngsawngin an hnathawh dan leh Keilungliah tuikhuah enkawl a nih dante an hrilhfiah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

AMC

Aizawl Municipal Corporation (AMC) leh Aizawl Tennis Court kiang vela chawhmeh zuarte inkara buaina chu chinfel a la ni lo a, nimin pawh khan an innawr leh a ni.

AMC Deputy Mayor Pu Lalringliana hnen atanga Akashvani Aizawl thudawn danin, AMC chu a dinna ngaiah a la ding reng a, ruahman dan chuan July 1, Thawhlejni hian UD&PA Minister leh AMC Mayor te bakah mi pawimawh hrang hrang te nen an sawi ho leh dawn a ni.

Zirtawpni zan khan Aizawl District chhunga khaw hrang hrang bakah Aizawl Tennis Court bul hnaia chawhmeh zuar thinte chu an tih thin dan pangngaiin an kalkhawm leh a, mahse AMC thuneitu lamin inzawrh an phal lohna hmun a nih avangin AMC lamin an dang thung, tlaivarin an indang a, nimin zing dar 9 thleng vel thleng khan indangin a hnuah erawh chawhmeh an zuar chhunzawm leh ta tho a ni.

(Kar hmasa leh a hma lama thu awm tawh angin AMC chuan Aizawl Tennis Court leh a chhehvel kawng dungah hian chawhmeh zawrh an phal lo a, khaw hrang hrang atanga kut hnathawktu ten Inrinni atan chauh chawhmeh zawrh nan a hmang thin thung. Kut hnathawk tute hian AMC lamin an thlai zawrhna tur atana hmun an siamsak chu a zim a, an leng lo niin an sawi a. Tukin zinga AMC lamin an dan avang hian nidang aiin an chawhmeh zawrh te chu hralh a harsa deuh niin an sawi)

<><><>

PM MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

<><><>

PM & Astronaut talk

Prime Minister Narendra Modi chuan International Space Station Group Captain Shubhanshu Shukla a kawm a, India ram atanga hla ber ni mah se India mite thinlung hnaih ber an nih thu leh, an zinkawng chu hun thar bul tanna duhawm tak a ni a ti. PM Modi chuan thinlung takin lawmpuina leh duhsakna a hlan bawh.

Group Captain Shubhanshu Shukla chuan India aiawh van boruak a zin thei a nih chu a lawm thu a sawi a. A thil tawn te sawiin, Prime Minister Modi hnenah Captain Shukla chuan Prime Minister chuan India mipuite tan kawng a hawnsak niin a sawi bawh.

Punjab

Punjab sorkar chuan State Prisons Department-a officer leh hnathawk mi 26-te chu duty bawhchhiat leh ngaihsak loh vangin a suspend. Heng zingah hian Mansa, Ludhiana, Ferozepur, Goindwal Sahib, Amritsar, Kapurthala, Hoshiarpur, Bhatinda leh Pathankot Jail atanga Jail Superintendent, Assistant Superintendent leh Warder te an tel a ni.

Punjab Jail Minister Laljit Singh Bhullar chuan dan bawhchhiatna, nungchang tha lo, thununna nei lo, duty-a awm loh leh tangte nena inhnamhnawih ang chi thil tih chu enliam theih a nih loh thu a sawi. Kumin kum tir lam pawh khan Sangrur, Amritsar leh Hoshiarpur Jail-a senior officer-te chu pawisa la in tangte hnena ruihhlo leh mobile phone supply-a an inhnamhnawih avangin man an ni.

<><><>